

Wann die Hoffnung Sterbt

De Stefan un ich han newenaner in unserem Dorf gewohnt, mir han uns wie guti Kumrade verstan, wann er aach um a phaar Jahr älter wie ich war.

Em Stefan sei Elter ware Baure im Dorf mit eener gsundi Wertschaft, er hat drei Gschwister ghat, er war de zweitjingschte vun alli. Sei Bruder – Toni hat der gheeßt-war um guti phaar Jahr älter wie er. Dann hat er noch zwei Schwestere - es Kati un es Greti – ghat. Ihre Eltre han verzich Joch Feld uf unserem Hottar ghat, ihre Vermeeje war net so groß, awer aach net so kleen gwen. Bei ihne im Stall han immer finf bis sechs guti Ross un vier bis finf Kih gstan, dann war awer noch des Jungviech do, was se nohgezoo han. Ganz hine im Hof han se a Schweinestall ghat, wu immer phaar Dutzend Schwein drin ware, die sin gemäschd gin for de eigene Verbrauch un for Verkaafe, De Toni war a fleißiche Bu, der sich in dere Baurewertschaft gut ausgekennt hat. Die Mädle han awer aach vun fruh bis spot am Owed fleißich mitgearweit, un de Stefan hat sich aach net hinefine glosst. Wie er aus der Schul ausgeblieb war, is er glei de kleene Knecht in ihrem Hof gin..Drum is es aach in ihrem Haus un Hof so gut zammgang. Ihre Elter ware stolz uf die Kiner un uf die Wertschaft. Wann sie sonntags in die Kerch gang sin, is ihre Motter mit die Mädle vorgang, un die Mannsleit sin immer a gutes Stick hinedran kumm. ihre Vater hat die Bruscht rausgstreckt un de Kopp in die Heh ghal, grad so wann er die Leit, die ihne noogschaut han saan mecht. Des is mei Familie, un des sin mei Kiner, uf die sin ich stolz, un ich hoff das se alli guti Bauerschleit were.

Dann is awer net lang dernoh a Unglick passiert. So a braune Moler vun unserem Motterland, hat a Kriech mit die Nachberschländer angefangt, un de Toni hat inrucke misse. Net lang dernoh is vun seim Regiment a Brief kumm, dass de Toni vor;s Vaterland sei Lewe gin hat misse, er is in Russland ufm Siegreiche Schlachtfeld begrab gin, so hat des in dem Brief gstan. Des hat dem Toni sei Elter un Gschwister hart getroff. Sie han sich selwer net ausgekennt, for weles Vaterland er sei junges Lewe gin hat. Des Lewe im Baurehoff war nimi so wie es vorher gwen war, em Stefan sei Leit ware zumeischt traurich un schlecht ufgleet.

Die Zeit is vergang, sie sin im Haus un ufm Hottar dr Arweit nohgang, awer es hat was Schlechtes in der Luft ghong, un im hiner Hof is verzählt gin, dass die Russe ball bei uns sin were. An em Herbscht Owet war de Stefan mit seini Kumerade in eener Gsellschaft. Die Mädle han Zwetere gehäkl, die Buwe han Karte un mit die Mädle Versteckle gspielt. Do is dem Adam sei klene Bruder hinkumm un hat gsaat, dass die Russe schun im Dorf sin. Des war a Schreck vor alli, sie sin alli dorch die Gärten schnell hemgloff.

Des Militär hat noh de anere Taa die Schwoweleit im Dorf alli guti Ross wechghol. Sie sin aach in die Schweinställ un han a große Taal Schwein zammgschoss un aach mitghol, in die Weinkellere han se die Fässer angeschoss, so dass de Wein im Keller knechelhoch gstan hat. Wie die noh abgezoo sin, hat es Staatsvolk die Schwowe noch des wechgholl was iwrichgeblieb war.

Enmol Morjetz, wie de Stefan mit sei Schwestre un ihre Elter gfruhstuckt han, is a Russ un zwei Rumänischi Schandare rinkumm un han sei Schwestere un ihne sofort verhaft. Sie han gsaat, sie misse mitkumme, was weiter passiert, were se schun in Zeite heere. Ihre Elter han do gstan un han ihne net helfe kenne, weil der Russ iwerhaupt stark grob war. Ihre Motter hat aarich Gegrisch un ach ihrem Vater sin die Träne an die Backe runergeloff. Die Jungi Kiner sin in es große Dorfwertshaus gfiehrt gin, dort wu schun die meishti Leit, die wu des Unglick getroff hat, rumgstan han un sich naner gfroot han, „Was mache die mit uns? Ihre Elter han ihne nohträglich Esse un Wintergwand bringe dürfe. De anere Taa in aller Herrgottsfruh sin dann die ganzi Leit uf Detta, so an die achzehn Kilometer zu Fuss, im Schnee an die Bahn getrieb gin, wu se dernoh in die Viechwaggone, was dort schun gstan han nin han misse-, die Weibsleit un die Mannsleit extra. Es Greti des es Jinschti vun ihne war, hat sich an de Stefan ghong un wollt ne net auslosse. Der russische Postn hat ehm uf die Händ gschlaa, dass es sei Bruder auslosse soll. Alli Leit was des gsiehn han, deni sin die Träne kumm. Domols hat de Stefan sei Schwestre es letschti Mol gsiehn, Der Zug is noch in seller Nacht abgfahr. Un weil es immer kälter gin is, han die meishti Leit schun so beiläifich gwisst, wu s hingeht. Noh zwei Wuche Fahrt sin sie mol in eener Nacht uf em frei Feld aus die Wagone raus getrieb gin. Enstaals ware se froh, dass se enmol dorte rauskumm sin, weil es war bal nimi zum aushale. Dann han se bemerkt, dass die letschti Waggons, wu em Stefan sei Schwestere drin ware, gar nimi do ware. Sie sin dann in a große Halle gfiehrt gin, in der hat de Wind stärker geblost wie draus im freie Feld. Dort drinn war Stroh glej, un die Postn han ihne gsaat, dass se do schlofe dürfe, die was prowier for fortlaafe, were zammgschoss. Um die Leit iwerzeihe, hat a Posten phaarmol in die Luft gschoss. Dann han se ihne gsaat, dass sie des, was die aneri do in Russland kaputt gmacht han, ufbaue misse. De annere Morjet han se a Krautsupp kriet, un sin in Gruppn ingetaalt gin, un in die Kohlegruwe gfiehrt gin. For unser Leit war des a schweri Arweit, solang sie awer noch Speck vun derhem ghat han, han die meishti sich an des Schicksal gwehne mechte. Awer schun noh dere erschti Wuch, han die Russe ihne den Speck, wie se in dr Arweit ware, wechghol. Es hat gar net solang gedauert, sin aach schun die erschti Männer, wu schwach un krank ware gstorb. Un es sin immer mehr gin. Langsam is die schweri Zeit in deni russischi Kohlegruwe vergang un endlich mol is der Taa an de Himml kumm, wu se alli hemfahre han dürfe. Wie de Stefan, noh fünf Jahr Arweit in die Sibirischi Kohlegruwe vor seim Elterhaus gstan hat, ware dort ganz fremdi Leit drin gewohnt. Sei Leit sin aus dem Kleenhaus, wu sie jetz gwohnt han, rauskumm for ne begrieße, awer er hat ihne ansiehn, sowie wann Sie sich garnet gfreie mechte. Wie er noh gfroot hat, ob es Kathi un s Greti schun derhem sin, is sei Motter omächtich gin. Wie s ihre dann besser gang is, hat se immer mit em Finger gejer die Bahn gezeigt un hat immer nor gsaat: Sie misse vun do kumme“ Ihre Aue han awer so a ungewenliche Glanz, ghat, grad so sowie wann se nimi ganz do wär. De Stefan is dann ins Haus gang un war stark traurich. Erscht do derhem hat er gheert, dass sei Schwestere in Russland gstorb sin.

Em Stefan sei Elter sin seit domols immer wenicher gin, Sie han net verstehn kenne, was ihre Kiner verboch han, weil se net mit de aneri Leit hem kumm sin. Schun im nächschte Johr, im Fruhjohr, sin alli zwei gstorb. Noch im Sterwe hat em Stefan sei Motter immer gejer die Bahn mit eem Finger gewies, un hat mit schwacher Stimm gsaat, „ Sie misse vun do kumme,“ Sie hat se gsiehn, wie se mit, m Toni am Hottarbrunne langsch gang sin.

De Stefan is dernoh nochmol vor drei Johr in die Kohlegrub vun Anina ingezoo gin, die Owrichkeithat hat behaupt, dass er als normale Staatsbirger vun Rumänien sei Militärzeit in die Kohlegruwe mache muss. Hemkumm vun dorte is er nimmi, bloß a Schreiwes is an die Gmeinde kumm, wu drin gschrieb war, dass bei ener Gasexplosion in dere Grub, de Stefan um; s Lewe kumm is.

Un so is a stolzi Familie zu Grund gang. Die Hoffnung die em Stefan sei Vater sich gemacht hat, hat der braune Moler iwer de haufe gworf, un am End sin alli Schwowleit arm ginn un han ihre Heimat verlor. De neije Anfang In Deitschland war schwer, vor vieli sogar stark schwer, awer alli han a neies Lewe angfangt. Freilich kenne se ihre Banater heimat niemols vergesse; des is domols mitzamm der Hoffnung for vieli gstorb.